



SIPA I TUŽILAŠTVO BIH ZBOG TERORIZMA PRETRESLI DVIJE LOKACIJE

Uhapšeni dvojac imao i zastavu Islamske države

BANJALUKA - **SIPA** je juče pretresla dvije lokacije u Sarajevu i uhapsila dvije osobe zbog terorizma.

Kako je saopšteno iz Tužilaštva BiH, **SIPA** je to uradila po nalogu Tužilaštva i Suda BiH u predmetu za terorizam.

Kako je istaknuto, pronađene su bombe, oružje i nekoliko zastava Islamske države.

"Tokom pretresa, nađena je određena količina oružja, bombi, municije, okvirova za automatske puške, noževa, borbenih prsluka, kao i zastave koje asociraju na obilježja i zastave tzv. ISIL-a, koji je odlukom Savjeta bezbjednosti UN-a proglašen terorističkom or-



ganizacijom", navedeno je u saopštenju.

Pojašnjeno je da je pretresima prethodila višemjesečna opsežna istraga u kojoj su utvrđene indicije za krivična djela.

Boris Grubešić, portparol Tužilaštva BiH, pojasnio je da su dvije osobe koje koriste navedene prostorije i koje su pod istragom stavljene pod nadzor policijskih specijalaca iz **SIPA**.

Dodao je da je u toku njihova

kriminalistička obrada, a da će nakon toga biti uhapšeni i predati postupajućem tužiocu, koji će donijeti odluku o daljim aktivnostima. Zbog interesa istrage, Grubešić je rekao da u ovom trenutku ne može davati više informacija niti detalja o realizovanim aktivnostima.

Kako saznaju federalni mediji, jedan od uhapšenih je Maksim Božić. BiH je 2014. godine izdala naredbu za raspisivanje međunarodne potjernice za Božićem, koji je rođen 6. februara 1990. u Bijeljini. Te 2014. godine tražen je zbog nedopuštenog držanja oružja ili eksplozivnih materija. Tada je iz Federalne uprave policije, aktom

Opštinskog suda u Tuzli, izdata naredba za raspisivanje međunarodne potjernice. Tada je naredeno hapšenje i ekstradicija, a mediji su prenosili kako je Božić, kojeg je tokom saslušanja u Tužilaštvu BiH spomenuo terorist Mevlid Jašarević, bio uhapšen još 2010. godine u kući u tuzlanskom naselju Grabovica, čiji je vlasnik Enes Sejrančić (27), koji je takođe bio optužen za terorizam. Njih dvojica su navodno planirali teroristički napad na Brčanskoj Malti u Tuzli na dan obilježavanja oslobođenja od JNA. Prema pisanjima medija, Božić je radikalizovan u Beču.

D.Š.